

不忠

以色列人，lín tiòh 聽上主 ê 話。因為上主 kah chit 所在 ê 人辯論，因為 tī chit-ê 所在無誠實、無仁慈，mā 無人 bat 上帝。

(《全民台語聖經》何西阿書 4:1)

咱是 tui tó 位得 tiòh 盡忠 á 是承諾 ê 觀念？咱是 tī tó 位頭一 pái 開始學習 koh 承諾 beh 遵守咱生活 ê 準則？

咱 ê 父母通常會成做咱頭一個老師。咱 ê 老母 kah 老父教咱啥物是 tiòh kah m̄ tiòh。咱真緊 tòh 學會曉，若是咱做 m̄ tiòh，咱會受警告 á 是懲罰。我 ê 老母常常是警告我三 pái 了後，chiah 祭出懲罰；我 ê 老父 siōng chē kan-taⁿ hō 我一 pái 警告 ê 機會。重點是，阮學 tiòh 少年人 ê 行為標準：「m̄-thang phah 你 ê 姊妹」，「m̄-thang 講白賊」，「食飯 ê 時，tiòh kā 你 thèh 來 khng tī 盤 á 內 ê 物件食清氣。」我 tui 我 ê 父母學 tiòh 最後 hit 項，而且我教 hō 我 ê kiáⁿ 兒；到我 ê 孫 á tòh 完全 kā 它忽視。

當我去讀海軍學院 ê 時，我必須遵守學校真嚴格 ê 標準，其中一項是禁止講白賊。若是你 hông 掠 tiòh 講白賊，你 tòh 會真無面子 hông 開除，而且無辯解 ê 餘地。誠實是 siōng 重要 ê tã-chì；所以，當阮出外 á 是度假 tng 來，阮必須 tī 小表格簽字，宣誓講：「我無做 chiah-ê tã-chì。」你 bē 因為做 hiah-ê tã-chì hông 開除；你會 hông 開除是因為你講白賊。

若是你 teh 讀 chit 本冊，你可能已經對耶穌基督承諾，koh 保證 beh 採納 祂活出來 ê 標準；當咱講：「主耶穌，

我接納祢做我 ê 救主」ê 時，咱 tòh 已經 án-ne 承諾 ā。咱若 koh hō 任何物件入來咱 kah hit-ê 承諾之間，咱 tòh 是不忠。Kám 有啥物物件比對耶穌基督保持忠實 khah 重要？我想 bē 出來。上帝對咱是完全信實 ê；而且 hit 種堅定 ê 承諾要求咱用盡忠來回報。

祈禱：上主 ah，求祢幫助我會記得祢用真 chē 方法來表明祢對我是信實 ê。求祢鼓舞我，不管 tú-tiòh 啥物困難 lóng ē-tàng 保持對祢忠誠；m̄ 是想辦法來回報祢 (he 是無可能 ê)，卻是用感恩 kah 敬拜 ê 方式來對祢忠誠。我祈禱 chiah-ê tã-chì 是奉耶穌 ê 名。阿們。
(1996.06.02)